

Pakiko Kasa?

Den nos komunitat awendia, hopi hende no ke tende di matrimonio! Talbes, nan a konosé parehanan kasá ku tin problema. Nan ke evitá problema.

Ma e mentalidat ei ta kuadra? Nan no ta rasoná asina den otro área. Nan no ta keda sin kumpra un outo pasobra piesa por dañá. Nan no ta stòp di bai skol pasobra algun hende diplomá no por haña trabou. Nan no ta keda sin haña yu, pasobra yu por kousa doló di kabes. Ma nan ta rechasá matrimonio, keriendo ku bibamentu ta ofresé ménos problema.

Ma kiko nos Kreador ta bisa? Beibel no ta laga duda. Ban wak algun motibu pa kasa:

1) Dios a krea matrimonio. Despues ku Dios a krea Adam, El a bisa “**no ta bon pa e hòmber ta so; lo Mi traha un yudadó p’è ku ta pas kuné**” (Gènesis 2:18). Mes ora despues ku El a traha hende muhé i a tres’è pa e hòmber tin e komentario aki den e relato bíbliko: “*Pesei un hòmber lo bandoná su tata i mama i lo uni ku su esposa. I nan lo bira ún karni*” (Gènesis 2:24). Dios sa tur kos i ke nos bon. El a krea matrimonio sabiendo ku hende por funshoná optimal dentro di matrimonio.

2) Amor sin matrimonio no ta amor. Awendia, tantu hende ta bibá simpelmente pasobra nan tin sintimentu romantiko pa ku otro. Ma nan ta stima otro di bèrdat? Por yam’è “amor” si nan no tin e wesu di lomba pa primintí i firma públikamente dilanti testigunan ku nan lo keda fiel na otro te na morto? Ta stimashon bèrdadero si nan ta laga porta habrí pa “stima” un otro amante? Kòrdando ku un hopi hende bibá eventualmente ta haña un otro partner, por yama esei “stimashon”? Ta amor ku nan ta **usa otro** pa haña nan gana?

Di bèrdat, hende bibá ta trose e promesanan matrimonial. Nan ta dispuesto pa keda fiel na otro den bon, ma no den malu; den rikesa sigur, ma no den pobresa; den salú, ma no enfermedat. **Frankamente bisá, hende bibá ta gaña nan mes ku nan ta stima otro!** Nan amor no ta kuadra ku Dios Su deskripshon: “*Amor tin pasenshi...e no ta buska su propio interes...tur kos e ta tapa, tur kos e ta kere, tur kos e ta spera, tur kos e ta soportá. Amor nunca..ta faya...*” (1 Korintionan 13:4-8).

3) Bibamentu ta desastroso pa yunan. Segun su buki *Love and Economics*, Jennifer Roback Morse ta bisa ku tin hopi evidensia ku muchanan ku ta lamta den un kas ku un mayor so òf un tata/mama di kriansa, ta enfrentá hopi problema...loke yunan di un pareha kasá ta evitá. Pa averahe, e yunan ei ta stòp di bai skol na un edat mas hóben, tin mas tendensia di kometé aktonan kontra lei, bebe burachi òf usa droga, tin bidanan mas instabil (pasobra hende bibá ta separá ku mas frekuensia ku hende kasá), èts. Un estudio a haña ku un amante bibando ku un mama i su yu tin 30X mas chèns di abusá di e yu ku lo ta e kaso si e tata mes tabata kasa ku e mama. Kòrdando esaki, si bo ta stima bo yunan, kasa!

4) Sèks fuera di matrimonio ta piká. Sèks ta Dios Su idea! El a invent’è pa matrimonio. P’esei El a prohibí tur relashon seksual fuera di matrimonio. “*.pa motibu di inmoralidat, laga kada hòmber tin su mes esposa, i laga kada muhé tin su mes esposo*” (1 Korintionan 7:2). “*Laga matrimonio wòrdu onrá pa tur hende, i laga e kama matrimonial ta sin mancha; pasobra Dios lo huzga fornikadónan i adúlteronan*” (Hebreonan 13:4).

Hende ta pretendé ku nan sa mihó ku nan Kreador, Esun ku sa kon e ser humano por funshoná optimal. **Dios ta yama bibamentu “piká”!**

Pakiko kasa? Matrimonio no ta sin problema! Ma en kontraste di bibamentu, matrimonio ta eksigí entréga total. Sin e ingrediente ei, **e problemanan di bibamentu ta muchu mas grandi ku matrimonio!**